

Radar meteorologic sin il Piz dal Weissfluh

■ (cp) Uss èsi cler nua ch'il tschintgavel radar meteorologic da la Svizra vegn piazzà: sin il Piz dal Weissfluh sur Tavau. MeteoSvizra, l'Uffizi federal per meteorologia e climatologia, schlargia uschia sia rait da radars meteorologics cun in'ulteriura staziun en in lieu muntagnard. Ensemen cun il radar sin il piz vallesan Pointe de la Plaine Morte duain las datas dal Weissfluh pussibilitar en l'avegnir da registrar meglier las precipitaziuns en las regions interalpinas.

L'indriz da radar vegn costruì sin 2843 meters sur mar, gist sut il Piz dal Weissfluh. L'areal che tutga tar il territori da la vischnanca da Langwies è gia bain accessibel. Quai è stà, sper la posiziun exponida cun vista ideala sur la Svizra sid-orientala, in criteri decisiv per la tscherna dal lieu.

Las lavurs per construir il radar grischun, che cumenzan la stad 2013, fan part da l'etappa finala dal project Rad4Alp. Suenter avair remplazzà ils indrizs existents sin l'Albis, il Monte Lema ed il La Dôle cun radars da la pli nova generaziun ha MeteoSvizra era cumenzà questa stad a schlargiar la rait da radars.

Ils indrizs en ils territoris autalpins sin la Pointe de la Plaine Morte en il Vallais, nua che las lavurs procedan dapi la fin d'avust, e sin il Piz dal Weissfluh en il chantun Grischun, garanteschin ina vista optimala sur las Alps. Quella è actualmain restrenschida, cunquai che las muntognas disturban per part ils signals dals trais radars meteorologics Albis, Dôle e Lema.

MeteoSvizra serra uschia ina largia impurtanta en la rait svizra da radars meteorologics ed augmenta il niz da la meteorologia da radar per la segirezza da la populaziun. Cun agid da datas da radar èsi numnadain pussaivel da far previsiuns a curta vista da precipitaziuns, urizis e tempestas. Quai è d'impurtanza centrala per far frunt a privels da la natira sco auas grondas, che pon avair consequenzas dramaticas surtut per las regions muntagnardas. Era la controlla dal traffic aviatc è fermamain dependenta da las infurmaziuns dals radars meteorologics. Cun schlargiar la rait da trais sin tschintg radars èsi en l'avegnir pussaivel da cum-pensar bain l'eventuala interrupziun d'in indriz e da garantir ina rait efficazia.



Radar meteorologic sin in Weissfluh.